

太上洞玄靈寶八威召龍妙經卷上

乃七

太上洞玄靈寶八威召龍妙經卷上 乃七

元始天尊言赤明始開混沌始分元綱流演

高上所撰龍漢冥蒙赤字輝爛自然天書微

妙難論處於玄之又玄號為海真龍王丈人

海真之王是海有真位在其中星氣所蓋以

號玄源一百八十靈海各有萬餘洪泉泉通

於水囊衝造三十二小天其時欲滅山海一

傾八威吐毒水火欲生海遊輪轉山嶽激崩

龍王縱壑蛟虬翻洋龍王從官三官諸君分

別有道記詔泰玄海真亂作諸海閉塞洞門

靈寶天尊元始高上真人已召八威制伏龍  
王赤字玉訣其中有文可度生死蠢飛衆生  
明可寶祕災眚以禳千日用習歲建日子午  
行道燒香轉經呼召八威龍王丈人聞經歡  
悅低頭閉眼有受召經不遇災眚八節登嶽

乃七

四時投淵大小劫至以符投津龍王奉迎鳥  
母引接上造玉京提攜玉皇  
元始天尊言三十二天凡有一百八十海又  
有嶽海三十二水囊龍王丈人遊觀海嶽洞  
淵之中見有可度見有可仙演造八威召龍

龍王却洪滅炎妙經常為行術自得延年尸  
解免脫十苦八難拔度七祖上登南宮朱陵  
林中自然飲食死骸還神

元始天尊以高上玄度真人八節E登靈山  
召諸海龍王夫人誦八契并召文及符隨節

用立春之日用青繒九寸丹書州郡縣鄉里  
年紀所封先生名某甲佩三部八景天仙地  
真常在身中乞某今立春之節奏名泰玄削  
除死籍斷絕罪根

立春日誦四方詠用法召文如前

嗟呼龍漢尊

勇猛高神王

洞淵諸靈寶

以召龍王君

魔王丈人主

元始元聖神

制威住八毒

滅洪止炎煙

逍遙虛無散

身生水火光

大運會開度

彌劫為一齡

春分日誦并召文及符用如上法

乃七

二

淵通龍到尊

水母承飛雲

諸虛靈嶽沒

蕩蕩無一存

赤鎮絕垺嶺

東井伏華津

玄和諸玉女

靈妃六甲人

空洞不進賢

靈皇還九玄

勤敬高晨業

以度得道尊

立夏日召文用絳繒八寸丹書如上法

赤明玉字生

大微劇鬱羅書

正光佩雲景

相好不爲多

化遊人中道

至真誰是家

乞免五難中

制召諸天魔

龍王嚙符出

諸海成塵沙

靈嶽不崩陷

福地更鍊胎

夏至日召文用絳繒八寸書如上法

虛皇承靈飛

太霄九玄上

風雲隱宛微

講誦五嶽匠

福地在河澗

靈山有洞尚

仙芝多妙藥

鍊服生光相

分布諸寶園

珠玉鎮靈藏

碑礫精琉璃

琥珀金剛鏡

立秋日召文用白素六寸書如上法

煌煌太白宿

茗茗峻嶒嶺

龍王決天河

諸海一時并

三十二天真

各佩威龍經

以過後龍漢

學者登玉清

觀行吐毒狩

漱芬灌冠纓

浩浩無窮崖

幽遼遠大靈

秋分日召文用白素六寸書如上法

乃七

三

劫運諸天交

大象不復生

十方靈寶尊

訖號真人形

三洞奉道元

真妙高上經

佩者入空虛

誦詠都泰清

道為真中尊

以度不窮齡

至真歸是無

學修飛上清

立冬日召文用皂縉五寸書如上法

靈鳥亂龍漢

鳳虬不復降

福首三台宅

號位真悲忘

靈嶽至學士

佩笈參師匠

持以游詣樂

消魔誦明鏡

三元元始宗

演造龍王召

八威毒氣散

諸海無涌遼

冬至日召文同用皂繒五寸書如上法

大明照十方

諸天各欲崩

靈業大乘宗

諸海發洪波

上造玉京基

下至淵洞鄉

蠕飛蠢動類

一切隨路行

群魔更束帶

受誠修寶經

輪轉變自然

體有無等形

右八節誦各隨節誦之



四時召文

四時之日春甲寅夏甲午秋甲申冬甲子投  
水簡用金龍一口碧珠二枚西水東向者是  
靈海源也正向北方誦契三過以龍珠相連  
朱書青繒置水中更重勅百八十靈海大真

八威不得放毒龍王啣符即爾響到若不見  
形者此水自有異聲涌浪即是靈應修之三  
十二年八威奉迎龍王導引  
重勅法召文儀

太玄太素太微三元君元始高真上景先生

玄和玉女靈妃夫人某甲先封某海神王以  
護淵通天洪漏水災今以某時之日奏賣金  
龍碧珠以跪先君乞上名帝籍削除死根  
四時日投水簡赤書青紙以北向誦四契梵  
天音

乃七

四

太玄太素太微君頌第一

太上洞玄文

三元靈寶真

元始吐玉訣

是為上古言

八威縱毒氣

誅滅妖俗塵

正道有空洞

高妙元氣尊

瞬目過六度

騰身參泰玄

百八十海沸

龍漢開洪門

淵通諸漢首

人鳥靈嶽根

虬獸蛟鯨勇

浩浩守洞文

觀見學仙客

蹊路放炎煙

催促鬱儀綱

收錄結璘晨

陽光不復朗

陰精不復明

百六陽九盡

大小劫更生

三元君頌第二

八威龍王神

住世無姓生

縱氣吐八毒

不度無道人

愚類不蕩除

俱會五苦庭

橫屍諸國土

白骨暴路間

靈嶽多俗穢

盡是憂惱臣

存時不修經

聞法耳不聆

勤競滅蠢類

蠕飛諸衆生

前身受是對

今乞免罪名

元始高真頌第三

蕩蕩龍漢宅

朦朧靈嶽冥

遼遼諸天府

混沌始氣生

寂寂幽洞宮

峻嶒靈真庭

飄飄高仙士

清淨本業銘

龍鱗處淵源

乃七

五

虎豹藏壠田

不見學至師

還聞苟且聲

饑咽食元氣

渴飲玄玉精

持養枯骨質

以度不窮齡

上景先生頌第四

溟滓豁落宮

誦泄浩無崖

列宿一時倒

星辰化爲逸

禁元根莽莽

丁皇無堪基

沉浮任運轉

焦枯各有時

蕩旦無無遂

萬劫復更來

人肌欸條命

至法度我災

迴遷虛皇路

億歲是一時

身佩八威策

以消八素災

元始天尊從龍王丈人龍漢諸真八威牽引

龍鱗虎豹獅子辟邪虬蛟鳳鵠鴻鷺雖雖而

來俱會南陽洞臺七寶宮中上觀洪崖其時

清虛澹泊天尊演召八威龍經策文符圖讚

誦以授未悟明案修祕受法寶玉得傳祕之

祕之輕洩滅身

八威策文修靈寶齋佩此策章群真嚮引魔

玉不干

八威策文法用真檀長八寸廣四寸白地錦  
衣長尺廣四寸囊盛齋時佩身三部八神在

左策文在右

策文裏朱字皆使方正

上古上皇元始天尊始生元君元素太真太  
素元一君三素高神靈寶元始君元始丈人  
大帝玉清神師景陽先生泰清玉歷太真大

聖大仙君五嶽地仙靈山道君某甲本生某  
郡縣鄉里屬某天被某宿封某嶽先生某官  
道士伏聞八威神策以召龍王元始生養特  
蒙高真賜爲封合上名帝籍削去死根威神  
侍衛群魔却行周歷諸海任意縱橫如文律

乃七

六

令

策文外符

百八十海精龍王丈人真形會轉靈寶  
度大小劫盟文元始演同  
上古高上丈人太上大道君元靈老子無量

道尊東府太上南極丈人西靈洞母北玄真人中宮太帝黃老元君同遊會淵通宗飄竺落諸天龍漢間清虛靜默記輪轉運度劫數衆始遣玄和玉女靈妃夫人各十二人賈太上洞玄靈寶大小劫天地運度八威策文以召龍王變化空洞以鍊真神導引生圖安鎮二十四真神其經高妙授與白石空洞玄度真人修學以付高上道君傳玉仙金母金母傳無上李夫人夫人傳北極老君老君傳上景先生先生傳太和王君王君等學各經數



龍漢經還洞鄉隱不復出學太上洞玄靈寶  
經者百無一上皇之時高上老子演置種仙  
使飛天人贖太古元始天尊三十六部妙經  
封置五嶽靈山洞中人間有至德者自見其  
文也至東晉成帝元年七月十一日甲子十

乃七

七

方靈寶天尊衆真下降開洞經演法度人乃  
授成帝此經上登十絕遺文世間化度一切  
明按祕也成帝受大小劫諸經盟信法物黃  
金五兩金環一雙五方紋繒金龍一口玉魚  
一口碧珠二枚博山香爐一口地布一張白

銀十兩上廚九人亦七五三盟法用此信以  
脫元靈老子始皇天尊作壇在崖石上使遙  
觀靈泉遠世人壇成法師東向告盟受者弟  
子某州界土穢氣胎生蠢類遭遇元始加潤  
和氣得貯妙文今奉齋法儀蒙以告盟億祖

為誓

弟子某郡縣鄉里某號某甲年若干歲甲以  
下生穢質被銜靈和三元所載三洞所養未  
知宿命拔罪之根明悟仙術昔詣某法師某  
甲奉受太上洞玄靈寶尊妙法經出入難想

至道妙貴非某甲下才腐骨臭肉所可佩誦  
不自忖量思効日新在進無退伏聞

元始演教大小劫八威召龍變化空洞二十  
四真神導引三光洞玄之根寶玉之尊洞一  
之真上真要訣實所希聞甲投命束首乞丐

成就恩惟明先生垂恩授度不敢輕露告盟  
之後七祖為誓約自閉塞寶玉有宣輕洩宣  
露甲身家口謝天地水三官萬沒之日後不  
敢有怨

某年月日某郡縣鄉里太一無極金剛畢券

三洞三景弟子左領神太上主者三皇五嶽  
大傳北嶽先生某官道士曾孫小兆真人某  
甲稽首再拜啓盟上告上啓

上上元始上古高上太上大道君元靈老君  
無量道尊東府太上南極元君文人西靈洞

乃七

母北玄一君中宮老君十方太真小臣某甲  
上啓元君應化經法賜宣令悟今有某甲謹  
齋法信求眇篇目臣以去某歲某月日謹詣  
某洞先生五靈真人某官道士某郡縣鄉里  
某對共告盟寶質珠玉為信啓付三十六部

目錄別告八景神真大小劫運度變化空洞  
周流五嶽大宅靈山今有某州郡先生祭酒  
某甲奉齋法信五方紋繒金龍玉魚碧珠白  
銀地布香爐求乞告盟度授寶秘安國救民  
土地歡樂無有憂患以遊行五嶽諸所經由  
江湖大澤山川溪谷群靈皆為伺迎龍麟虎  
豹獅子辟邪常所持會天真地仙覆蓋某身  
法啓度事竟某甲案如修承恩惟

上古太上告下三十二天削某甲死籍斷絕  
罪根弟子更向東方百八十拜禮三十二揖

向四方散髮臣某甲重啓某山太真靈洞天  
尊某甲求某告盟某經某山太真當爲保舉  
令某甲壽如靈嶽劫數不衰

弟子讀告盟頌

浩浩無窮崖

龍麟來奉迎

水母西游外

乃七

九

炎火不復傷

身登玉京闕

飄然凌高翔

太上洞玄靈寶八威召龍妙經卷上



